

四庫全書

集部

欽定四庫全書

宗子相集卷六

明 宗臣 撰

五言律詩

寄懷鄉園游好五首

浮雲日萬里空復滯燕臺朋好寧相負音書自不來
吾慚歌鳳侶君等卧龍才悵望青山裏薔薇幾度開

最憶論心者乾坤一草廬開尊銷夜燭聽雨長春蔬
作客殊寒暑憑誰共起居翩翩北來鴈似有故人書

那堪千日別直使寸心違望極頻藜杖情深自布衣偶
省長路草髣髴故山薇客思將江水春來滿釣磯

即有鴻書去其如鳥道長春來楊柳徑日憶芰荷裳鷗
鷺應無色田園豈盡荒難將尊酒意一聽楚歌狂

貧賤有情在風塵一病深向人歌白雪畏路失黃金爾
輩甘雲卧吾生肯陸沈故園松菊在早晚問投簪

送蘇生南歸

短鬚不堪數孤舟何太頻客途空歲月江國有絲綸劍

在猶干楚書成更上秦敞裘曾季子莫問下機人

四月一日于鱗子與元美約南溪之游偶以事

羈悵然有感

殘春已昨夜初夏自流年朝謁誰能倦松蘿爾輩偏孤
舟凌細雨積水下寒煙遠憶臨溪者何人不可憐

解佩豈朝客持竿遂釣徒年華過燕雀春色尚靡蕪赤
水心頻切紅塵爾自拘茲遊且不得何更問江湖

不分林塘好偏令爾輩遊花枝晴自動草色暮堪愁俯

仰聊停騎行藏且狎鷗茫然心共折何處是滄洲

病中答吳明卿見贈二首

一病秋能抱孤吟夜可殘採芝吾未得視草爾其難
瑤瑟人間思金莖露下看廣陵濤足賦江色不勝寒

其二

伏枕花頻改登樓月乍圓宦情踈病後世事得愁先
才已金門隱名非白雪傳新詩酬偃蹇三嘆暮雲前

有寄

憶爾辭燕甸逢人賦楚騷芙蓉千水暮薜荔萬峰高秋
月驚紈扇寒雲落布袍愁心不可問孤鴈滯江臯

贈別吳子

問爾何年至還能幾日留尊開朱鴈夕心折紫萸秋歲
月餘孤鬢關山任敝裘漁竿如可飭遲我狎江鷗

同于鱗子與元美郊行二首

誰識冠纓者常投水石間春風吹大道紫氣照西山松
徑荒難度楊枝亂可攀相逢勿遽返世路正摧顏

去去春蘿好行行朝雨寒路迷頻勒馬塵起一彈冠宛
轉溪園出依稀江路看所嗟情不愜無處問漁竿

送張明府謫教湖州

自古悲行路于今更畏途才名收倚馬宦計失飛鳬白
日晴開越青山亂入吳傳經稍欲慰咫尺對西湖

與錢惟重步月下

秋風何處起茲夕倍堪嗟不見碧雲色難禁孤月華客
愁驚蟋蟀鄉思忽蒹葭誰謂天河遠翩翩漢使槎

歲暮

霜雪不堪暮陰陽莽自過
淚偏兒女盡情為歲華多留
滯非吾意淒涼奈爾何寸心無可折落日滿庭柯

送王判

可嘆日為別兼之歲欲殘
青袍今作吏白髮已盈冠
鴻鴈千門夕梅花一騎寒
風塵好自愛行路古來難

除夕答謝茂秦徐子與見贈

今夜為誰永清尊只自持
歲華明日異旅思故人知
坐

待青春色行傳白雪詞梅花空復好愁絕楚江枝

送張簿之上饒

送君燕市北作客楚江西日月千山濶星辰一劍低馬
蹄仍遠道鳳翼且卑栖芳草天涯綠相思祇杖藜

寄遠曲

秦塞一投筆章臺日倚欄鴈書何寂寞龍劍有艱難烽
燧春華暮琵琶曉淚寒自知容色落不忍對花看

青海人頻去黃河信轉稀徘徊空夜月顚顚任春衣漢

將頻營壘邊兵未解圍近來常涕淚不獨為君揮

問元美病二首

倦遊吾未敢抱病爾何心萬里靡無色秋風一夜深長
嘯豈不得悲歌直至今茂陵消渴日還聽白頭吟

爾已青雲薄誰其白眼偏一身詩作僻萬事酒相捐枕
簾疎秋雨江山隔暮煙登樓知有賦莫向衆人傳

寄陸子

何時重把袂茲意有沾巾春去悲遊子書來見故人風

塵虛倚劍日月負垂綸一別清江上年華幾白蘋

同李司封蘇文選遊聖禪寺

有寺焚香在何人結駟來靈花如雨落貝葉不春開聽
法龍依水窺禪鳥下臺塵心忽到此那得遽如灰

送周先生之海寧

彩筆時難見青氍爾自尊一官聊日月雙鬢自乾坤雪
後西山賦風前北海樽因君寄鄉思好去過江門

答袁子

別思將春起鄉心與日摧已經三載別猶有一書來我
愧思鱸者君誠倚馬才黃金似芳草又滿郭生臺

遠思

歸期不可問客思坐紛紜白髮兩鄉隔青猿何處聞日
推蜀道險雲逐楚江分尺素看鴻鴈高秋或一羣

同李于鱗徐子與梁公實夜過王元美

一尊那忍負永夜坐堪酬鳳豈吹簫落人疑鼓瑟遊江
湖青桂暮闌塞白榆秋明月無南北冷然萬里愁

夜嘆

纖月稍稍起寒靈細細分窮途惟白雪畏路是青雲豈
作鵷鴻侶難期鹿豕羣平生霄漢思汨沒向時氛

三月

三月忽云暮一年空見春不堪垂柳色似與客愁新慘
淡時名棄迂疎長吏嗔清江有鷗鳥恠爾未歸人

天寧寺同于鱗子與元美餞別公實各賦二首
孤臣辭上國匹馬自秣園樹影僧窺日鐘聲客到門江

湖難寓目天地易銷魂行念中心約相思且勿論

分襟即此地握手更何年詞賦吾甘後煙霞爾最先世
情頻按劍生事欲逃禪今夜南樓月淒涼空自圓

送人

歲暮豈不苦離愁那可銷僅辭燕市酒已犯浙江潮明
月帝鄉滿梅花客路遙豈能因五斗楚澤負漁樵

于鱗子與元美夜過時元美將有江南之役矣
今夕復何夕相看又此亭金樽墮明月銀漢倒繁星吾

已甘多病君今幸不醒胡笳中夜起淒惻若為聽
亭花新乍落砌竹遠生陰砧杵秋城急煙霞故國深不
堪惆悵色兼入別離心去住傷萍梗茲期未易尋

皇甫別駕初至夜集得歸字

君自何方至憐才意久違朔雲停暮屐漢月照春衣江
左時名重人間雪調稀燈前出瑤草坐客不能歸

寄黃山人

已厭時人目翻生古道悲洲中鸚鵡賦臺上鳳凰詩風

雨客多病江湖髩有絲長途且萬里無夢寄相思

追送謝山人不及

白髮久為客青春忽與歸馬衝燕雪盡心逐塞雲飛
天地飄蓬甚河橋折柳違離情堪涕淚此際倍沾衣

月夜聞笛

暮雨浮天去寒雲歸峽遲青山饒遠色紫菊把新枝
何處風前笛頻停月下卮關河已搖落故向客愁吹

懷顧二丈

客久春如失愁深夜不開眼看鴻鴈去書對白雲裁叢
桂迷淮甸長楊識漢才江東秋色好消息幾時來

寄書

別已三年久情堪萬里餘常勞燕塞鴈不到蜀江魚浩
蕩心中事遲迴紙上書白頭還好在一汨滿朝裾

寄元美二首

念爾行搖落何心堪寂寥凌風雙鬢短畏路一身遙辟
荔亂江雨魚龍犯夜潮廣陵明月好曾聽玉人簫

客久非吾意愁來獨爾思寸心今已折尺素忍教遲風
雨相如病江山宋玉悲淮南行落日惆悵桂枝詞

夜集懷茂秦二首

得爾漳南信愁予冀北天蹉跎春事晚懶慢世情捐日
落黃河遠秋驚白髮先狂歌對明月莫受衆人憐
聽雨詩仍在開尊事已遙以予愁劍佩嘆爾得漁樵茲
意浮生失何時客淚消淮南行結隱不待楚詞招

寄黃先生二首

憶與先生別乾坤各泛萍可憐雙鬢綠僅對一羶青雲
落仙人洞天寒吏隱亭相思若江水日夜向南溟
塵路一知己浮名遂此生嶺南天共遠冀北日為情
昔
惜春堪長芙蓉夜與清尺書那不寄白鴈滿江城

對雪有懷于鱗子與明卿元美四子

暮雪一何急玄雲莽欲垂誰為黃竹詠千載有餘悲鴻
鴈稍疑羽闕河驟失岐薊梅寒入酒曾共故人持

再得元美書

楚日吾家到吳門使者來書纔片紙讀淚已萬行摧佩
有蘭堪贈衣知薜共栽梅花江路滿一酌向誰開

贈黃山人

羨爾逃名者蕭然卧遠臯絲綸江艇閣薜蘿石門高白
已殘雙鬢青猶戀一袍不堪搖落後重讀楚人騷

出郊過陸子和草堂同太史李公文學顧丈

進艇吾能遠攜尊客許同青天開萬象白浪失千鴻
莫英細堪數蘼蕪寒幾叢漁歌稍稍起知在石湖東

並入無新好相逢況故園
看山頻紫翠在野易黃昏
柳折風前笛蘭開月下樽
起來望北斗歷歷見天門

孤燈深入坐稚子遠相看
月動前江白星垂大澤寒
魚枯終有缺鷗敝不辭冠
嗟爾屠龍者清時只釣竿

清夜豈堪別長愁欲盡消
梅花春未折叢桂賦還招
白鷺暗驚棹青藜危度橋
月華散蘆荻寒思莽蕭蕭

過時寺訪袁三子敬

向客春鴻起逢僧夜磬前
慈雲垂大地慧日暗諸天
酒

至堪浮白吾來獨問玄孤亭入微雨似欲長青蓮

答周明府

相望一江暮難期對月明青山移病遠白鴈繫書輕天
地省喬舄兵戈阻漢纓秋風散麋鹿憶爾闔閭城

春夕同舒子房子子培訪陸長庚別業

暝色戎戎亂春陰慘慘生孤村流水夜一酌故人情雪
積天逾白江寒月較明綸竿吾欲把頗怪楚漁驚

元美有江上之約未得遽赴悵然有思二首

亦自悲春暮居然負所期金山一柱立滄海萬波隨征
鴈羣羣急浮雲日日吹淹留吾有待吾愛桂花枝

去路惟楊柳吾衣況薜蘿如何明月夜不作片帆過紫
氣星辰動青天吳楚多尊鱸秋正好知爾醉漁蓑

小園花開悠然獨酌

避世誠何意為園信有才陰晴三月暮遠近百花開春
訝林塘遍時愁風雨來酒杯吾共女日日好登臺

有客

豈亦沈淪者頻來問釣磯
青天雙鳥去白髮一漁歸
忽雨新楓摘如雲長巖薇
山花似留客隨處傍人衣

白馬湖泛舟三首

宛宛春潮入紛紛上客從湖
今蕩白馬棹恐碍遊龍折
柳晴相媚攜尊日可重君
看千水外已自長芙蓉

何限人同在心知我獨來
孤峯雲不薄萬象日頻開
稼穡
牆山中計鷓鴣水上杯
桃花忽如雨髣髴到天台

青蘿堪作服白鹿遂為羣
江樹低從密溪流曲更分
停

孟生桂月掃石起松雲徙倚悲歌去翩翩向紫氛

吳中兵亂海上徵援感事賦懷因寄元美

世變忽如此天心那可測蛟螭江欲裂戎馬地堪支
當日銷金甲斯人遂赤眉羣奴把蘆管應向闔閭吹
獨吟心欲折南望首頻搔鼓角鯨如立樓船蜃自高
青天失戰馬落日慘征袍稍幸王開府臨戎有佩刀

傳檄紛天地徵兵到薜蘿愁來失俯仰書去畏江河
痛哭千村暮橫行萬騎多滄洲狂客在應悔罷鳴珂

不盡黃塵起重驚赤羽馳無書問消息有淚到瘡痍家
國愁兼入行藏事可疑浮生同遠近斟酌向鸛鷄

雨夜沈二丈至二首

榻有何人下君能此夜過寒蟬吳客賦衰鳳楚狂歌雨
氣千江入秋聲萬木多明朝寒浦望搖落有漁蓑

樹色迷寒渚江流没石梁驚風孤鴈下聽雨一燈長蟋
蟀夜堪賦薜蘿秋可裳相看愛容鬢時序有新霜

不盡

不盡梅花路其如桂樹叢天高片雲紫木落萬山空砧
杵自秋簾關河有塞鴻何人抱瑤瑟今夜月明中

中秋有懷茂秦

日落寒江上尊開北斗前高秋中夜減孤月兩鄉圓人
隔黃河遠書無白鴈傳謝莊應有賦何得問嬋娟

進艇

白苧聞歌好滄波進艇遲暮雲殘薜荔秋水失鸕鷀日
落中原紫天高北斗垂梅花已零亂玉笛莫頻吹

夜

明月有如此況從湖上看驚蘆秋鴈起把酒暮鐘殘楊柳垂垂暗龍蛇去去寒夜來新水闊吾欲飭漁竿

人日寄吳明卿舍人

尺素不相寄孤鴻那可聽瀟湘秋水曲何處白雲停滄海又人日金門自歲星鳳凰池上草應只為君青

陸長庚夜至

戎馬暗江國君從何處來門驚芳草遍尊對早梅開雨

雪春衣短魚龍夜笛哀中宵撫長劍惜爾陸雲才

別袁使君

久應郎官宿猶乘使客槎宦情摧郡縣長路莽龍蛇海
外珠含日天南梅正花壯遊千萬里且莫問煙霞
繫鷁殊方路聽猿故國情關河同汨遠楊柳共愁生攬
轡江雲暮停車嶺月明泠泠鴈湖水人比使君清

席上贈東麓山人

茫茫飄素髮曲曲到寒扉亂石蘼蕪徑殘春薜荔衣一

尊青鳥去雙袖白雲歸九十猶能賦如君世更稀

送馮尉

一尉爾何有孤槎路最便關山寒食後風雨暮笳前
入夜江看月行春路拂煙青蓮幕下客來往日翩翩

即事六首

詎知烽火色亦到海門東九市旌旄立千家杼軸空
漁樵新授甲都護驟從戎寂寞江天上驚看一劍雄

白日頻搔首青山一杖藜星辰千騎入風雨萬家迷有

路難舟楫中天急鼓輦愁心與芳草江上共萋萋

赤羽遙傳越黃蘄近接吳夷歌分鼓吹野哭散薜蘿日
落江流急天高海氣孤中原有廉頗爾輩敢長驅

敵騎縱橫甚將軍轉鬪頻兩間迷白晝萬象失黃塵江
海遂流血弓裘豈著身招魂誰與賦洒淚寄青蘋

時王洪二

將軍
戰死

華夏翻連寇江淮遂苦兵鯨鯢揚子渡日月棘門營俠
氣荊卿劍雄心漢吏纓爾曹何足慮流涕此蒼生

坐嘆兵機失兼憂國計存干戈在淮海消息已乾坤授
鉞曾諸將宵衣獨至尊定知哀痛詔早晚下江門

寄子與明卿元美三子

同心久相失羈思近何如星出窺龍劍天長阻鴈書滿
江紛甲鼓落日泣樵漁去住情兼苦奚方定卜居
豈乏青雲侶其如白雪盟一分燕楚濶三見柳梅生眼
底簪袍計身前詞賦名放歌當落日的的為誰明

寄真州張子二首

世路驚投壁君才類握珠談經深歲月垂釣任江湖落
日千峰紫長天一劍孤凌風有羽翼與爾立相須

一望隋堤草孤吟楚岸花賦成似班馬身在只煙霞夜
月懷湘瑟秋風進漢槎斗間垂氣色吾欲問張華

元美訪我百花洲上夜集四首

君來何節鉞秋到正江湖斗室羣星聚天門二曜孤古
人窮抱玉吾道忌投珠歲晚魚龍寂臨流未可呼

終日不得醉相看獨奈何狂心知爾甚青眼向人多席

已移星月衣猶掛薜蘿興來歌楚調雪色滿江河

坐對百花落孤登萬里樓醉開吳楚色狂失鳳鱗愁握
手青燈少論心白日浮相思曾往昔汨逐大江流

雙眼人何白孤懷爾獨長相看鴻鵠志不厭芰荷裳黃
菊紛垂露丹楓莽下霜湖南泛明月髣髴對瀟湘

送徐山人還吳

問君何處去一騎大湖邊久客青春暮多愁白髮先征
衣裁薜荔長劍倚風煙江上波濤急新詩莫浪傳

去住悲生事乾坤總畏途梅開春到楚柳折曉歸吳倚
棹江雲亂傳書海月孤知君饒雅思早晚著潛夫

秋夜顧二丈來集二首

少別已殘暑相看失舊容秋衣下風露夕草亂芙蓉世
故尊前盡鄉愁雨後重徘徊望北斗明月照千峯

一徑陰陰入孤煙去去斜江亭頻載酒巖桂正逢花吹
笛驚黃鳥持竿散赤霞看君靈氣甚早晚問仙槎

得徐子與書

不分黃塵色稍驚白鴈音傳書燕塞遠落日楚江深戎
馬乾坤汨豺狼道路心聞君持漢節松下擬抽簪

簡陸子和二首

歲月仍吾病風塵奈爾何青天應自問白雪向誰歌夜
立殘砧杵園行久薜蘿相逢恨咫尺況乃隔江河
握手朱明過驚心白露漙江平低鴈翼潮落進漁竿野
色蘼蕪淨秋聲蟋蟀寒相思對新月疑在異鄉看

中秋遣騎迎沈二丈北莊

遙憐滄海上獨對白鷗羣客自殊方到秋看此夜分凌
風孤騎遠掃徑一鴻聞明月湖南早君無待暮雲

中秋無月呈席上諸公

翩翩攜杖至愛此河中洲不見關山月空分天地秋魚
龍潭水黑松桂石門幽瑤瑟何人抱湘靈未易求
寂寞自松逕蒼茫任草廬高雲莽不止明月竟何如席
上頻窺酒盤中僅辦蔬天風如可馭吾欲摘蟾蜍

秋夜同李伯章高子明徐養浩泛湖

高沙迴白鷺遠水到青天
棹恐羣星亂盃驚孤月圓
秋聲來薜荔夜色淨嬋娟
玉笛君能把吾將弄紫煙

黃山人夜坐

日散千峯紫煙收萬樹青
高雲去莽莽孤月寒冥冥
歲序已新鴈江沙空亂螢
餐霞真愧汝徒復問黃庭

聞鴈

一枕何能得長愁至不禁
魚龍殘夜笛風雨急秋砧
天入蕭森氣人兼去住心
湖南有新鴈作意送悲音

無月

可怪清秋月難看
永夜輝蟾蜍高不落
烏鵲暗能飛迷
徑頻呼燭驚寒驟
問衣羣公未應去
雲色漸霏微

客夜

歲暮青山遠
天空白鴈殘
孤舟凌夜發
長劍共誰看
鼓角高城急
星辰大地寒
中宵起遙思
倉卒負漁竿

山陵陪祀二首

闔闔門重啓
星辰地一隅
寂寥羣籟動
慘淡百靈趨
劍

佩當風亂松楸上月孤他年神武氣或恐未荒蕪
石馬鳴何日金鳧起別宮關山不改色天地自相雄惆
悵君臣禮淒涼歲序同泰陵千古泪一灑翠華東

山陵道中四首

處處春雲色相逢上翠微粉榆向人發鴻鴈背天飛列
騎松為蓋羣峰霧霧作衣歲華空浩蕩難問故山薇
吾愛天門近何妨日馭斜愁邊歸燕雀意外避龍蛇不
辨層崖樹難逢三月花向來邊騎入滿路散悲笳

路迷人屢問石險騎常停折柳新能綠看山近失青峰
高天兀兀泉細日泠泠何處無春色吾今愛地靈

馬遲榆柳徑人指鷺鷥班諸帝留弓劍千官肅佩環風
雲回紫塞日月滿青山王氣中天在朝朝護漢關

過明卿

頻來春騎遠最苦夜盃傳深語江河在雄心日月前千
秋難自定萬事竟誰先豈作巴渝客常驕白雪篇

得于鱗書二首

重來擊筑飲偏憶和歌人
明月漳河夕梅花碣石春
愁難千里破情到尺書
具誰不疑斯道君當愛此身

舊侶淹漳水新詩寄漢關
鳳麟千古色鸛鷺衆人班
易側乾坤目寧開紫牘顏
寒帷猶有賦落日太行山

憶弟

忽是青春別難堪白日移
江山一弟遠鴻鴈尺書遲
湖上又芳草淮南多桂枝
池塘尊酒夜知爾重相思

吳舍人得子

持我百年意看君一日情人間麟趾少池上鳳毛生桂
發燕山色珠來合浦明他時弄環語應令楚妃驚

哭梁公實十首

當日梁鴻去青山弄紫煙形容疑好在消息是誰傳鵬
鳥豈來舍龍蛇或值年倉皇不可問隕涕五噫篇

使者春江到傳君隔歲書開函生氣色數字慰躊躇日
月孤吟失河山一病虛皇天深忌汝竟不免樵漁

徘徊南斗下歷歷少微星一夜因風隕高人遂不醒孤

雲垂慘淡萬象驟沈冥莫問西樵桂千秋空復青

羅浮不可望鎮日紫霞封爾把金光草行吟第一峰驚
飈殘薜荔驟雨泣芙蓉恐逐仙人去青天跨白龍

汝去亦何速人生良已浮蒼梧一灑淚赤石萬峰愁才
或雲霞妬名非劍佩收知無封禪草漢使不須求

五子中原得千秋僅一麾壯心何遽折吾道益堪悲大
海東南去天風日夜吹獨留龍劍在紫氣斗間垂

長安曾落日為爾抱瑤琴一鼓秋雲白瀟湘寒色深斯

人遂不見是物可無音坐憶龍門曲潛然淚滿襟
少別即成古相逢豈在今黃河難北注白日似東沈天
地冥鴻志文章逐鹿心悲風吹大壑夜夜助蕭森
漢省空題柱文園早閉關生難看白髮死豈負青山天
柱浮雲色茫茫去不還肯思黃石侶萬一到人間

浮世誰能免如君獨可哀荒榛滿天地玉樹莽塵埃裘
馬偏窮路江山不盡才更憐擊筑者蕭索薊門臺

初夏夜同明卿元美遊張氏園亭

塵途忽到此世事頓相違
月色輕隨馬松枝亂拂衣
相逢青滿眼並坐綠成圍
便作幽棲得何須問釣磯

修爾過山雨蕭然對石欄
雙衣絺綌薄五月薜蘿寒
高竹翠難把新松秀可餐
吳歌沉在耳真作故園看

一逕杳然入參差絕可憐
古臺荒自出石磴曲相懸
林密難窺月枝高易破天
誰能吹玉笛吾欲弄蒼煙

太虛何必問一壑坐相收
橘柚山形古藤蘿石壁幽
盃疑天外把人似月中遊
莫作霓裳曲翩翩不可留

夜色亂相射幽人那可禁天流孤月白庭落大槐陰忽
起千秋思能空萬里心長吟一汗漫纖露下衣襟

聞島夷將逼湖州寄懷子與

兵已蒼生苦書仍赤羽愁風吹遠海立潮壓太湖流鼓
角天應裂鯨鯢日不收桃花藏戰色慎莫問漁舟
汝在登天目春來似綠林荆榛黃鉞入烽燧白雲深百
戰江山色千家隴畝心當年一匕首應或作龍吟

同余德甫吳明卿王元美再遊張園

為愛林塘好頻從駟馬來僅成三日別復作一尊開橋
憶牽衣草庭思待月梅昔心還鹵莽此夜重徘徊

畏客雙尊在留人一榻遷浮雲去萬里明月更嬋娟細
柳風藏碧新榴夜失妍無能永茲夕心折薜蘿前

不盡山靈僻難持幽思翻星辰莽相照鳥雀一何喧竹
葉傳金甕松花落石門危峰一長嘯髣髴是崑崙

何處陽春調來同此夕歌地能燕市有人得楚狂多把
盞青天墜題詩紫石磨一呼去颺颺片語即江河

零露隔金掌長天轉玉繩夜驚羣象遠狂得寸心憑高
樹歌能立危巖暗可登何當謝塵網日日白雲層

問余德甫病二首

浩蕩俱燕市蕭條自馬卿茂陵拾瑤草消渴望金莖夕
鬢裁詩短秋雲伏枕生南樓今夜月故向客愁明
獨憐青桂侶高卧白雲樓見爾能稱病何人肯倦遊星
河雙杵夕風雨七陵秋且莫歌芝曲商山不易求

立秋夜明卿元美來集二首

塵心不自好歲序莽相催風起千門亂秋隨二客來
絺衣雲共白紈扇月同開且莫悲搖落吾慙作賦才

酒至期晨漏風來破夕陰星辰垂戶小蟋蟀語庭深
白眼千年思青天一夜心併隨秋色動四顧起蕭森

答明卿給事

世事憑誰問浮生得爾同有心俱欲折無路不歸窮
戰伐乾坤色安危將相功君看鳴玉者楚楚日華東

蕭然雙鬢短莽矣百憂新白雪孤調世黃金巧識人勢

應駭積羽心或急批鱗遂恐風塵色難圖蘿薜身

明卿宅分得宮字

翩翩傲世者馬上落青楓把酒長安月殘秋碣石鴻玄

芝紛下蔡白羽急西戎向夜寒

闕起

漢宮

德甫明卿元美肖甫夜過時肖甫將有使命矣

得來字

借問此何夕秋高冀北臺浮雲萬里去明月幾時來莫
惜黃金盡其如綠髮摧相逢不成醉鼓角道途哀

聞子培又下第賦此寄之

憐汝不得意上書今又回秋風江色暮愁見菊花開抱
玉時堪泣投珠夜更哀薊門看白鴈曾否故園來

九月驟寒二首

頗怪雷仍起還驚雪乍飛陰陽曾世變順逆摠天威白
馬紛傳檄黃龍正合圍北風休更急漢卒夜無衣
搖落一何甚西風起大荒黃霾吹欲立白鴈急分行倚
檻深看雨懸燈數問觴流離滿天地茲夜不堪長

雪夜訪明卿病時有客因簡元美

伏枕寒仍立傳盃深可停雪吹天地白山掩薜蘿青耳
目予今病浮沈爾昨醒客言能鼓瑟或恐是湘靈
夜色流燕樹寒霾失薊門予難歌白雪爾豈妬清尊日
月憑雙眼乾坤阻片言坐來心萬里忽欲問崑崙

明卿宅同元美分賦得席上筍

二月破雲根千行碧玉新湘痕知有日孟泣豈茲辰酒
對殊方夕盤留故國春吾將付風雨片片作龍鱗

賦得席上菊

一枝吾在把不必向籬東
秋色近相媚寒香夜可終
酒來疑泛白燭滅似愁紅
好為攜懷袖玄霜下遠空

九日

九日吾家會遙憐骨肉歡
一身懷橘負羣弟把萸難
蜀道向愁險楚江今更寒
白雲空在苒可得故園看

秋風

秋風吹萬里一夜過扶桑
落葉碎難掃孤鴻高自翔
登

樓來朔雨倚劍下邊霜聞道榆關使飛書入建章

東臯隱居為子與尊人賦

一逕斜臨水長汀曲抱沙古來鴻鵠侶雲上白雲家種
橘開新溜尋芝數落霞武陵溪不遠石壁有桃花
天目三千尺高樓第一峰瀑來飛萬馬石削起雙龍白
日江華細朱霞海色封行歌秋更好散髮弄芙蓉
亦抱杞人念其如茗水幽手攜青玉杖坐老白蘋洲萬
象秋如滴羣峰日亂流太湖三百頃處處不驚鷗

避世亦何甚空山一釣臺幽人瑤瑟至稚子石門開白
髮照秋水青天落夜盃近雲常五色或恐漢麻來

得子與離家消息

使者發湖干千山搖歲寒漁樵心或負烽燧鬢應殘青
雀凌風上黃河落木看貂裘須早御朔雪滿長安

懷李伯章

故園棲隱處何得爾為羣握手先朝雨論心到暮雲江
湖雙鬢短日月兩秋分豈有同心者令子不念君

簡陳使君

父老書頻至瘡痍嘆未醒
長懷閩日白難照楚山青
野兕稍離室河魚更入庭
怨歌滿天地不遣使君聽

同明卿子與送別于鱗元美席上得天字

春色何堪問開尊是別筵
中原送二子北斗散高天
薊日愁難緩吳歌汨與傳
千山分馬首那忍遂揚鞭

得元美書

使者春何往吾徒日轉孤
屢書心盡折一字眼堪枯
未

測皇天意其如壯士圖自知寒色甚不敢怨明珠

既賦金山篇寄子與復系之此詩

寄爾金山賦登山莫自歌恐驚明月去其奈白雲何夜
掉鯨波急秋衣蜃氣多憑誰慰搖落滿目是江河

同峻伯夜過助甫得鐘簫二字

以我天涯泪洒君庭下松寸心燕市筑雙鬢薊門鐘明
月還依馬浮雲欲作龍相思如有贈慎莫問芙蓉

萬柳催吾別孤槎去國遙主恩還劍珮春色豈蘭茝白

雪寧誰妬黃金任爾驕美人從此隔忍聽廣陵簫

發京

十載侍青瑣殘春出薊門浮沈原宦計遠近摠君恩芳
草愁邊綠燕花泪共繁孤心似列宿常傍太微垣

長庚純一舜隆既別憶之

一別不自意茫然空復愁孤舟仍盜賊多病已春秋明
月一江遠故人何處樓風塵雙泪眼為我寄滄洲

渡江

秋風高不極破浪片帆輕鴻鴈衝沙起蛟龍傍檻鳴愁
人芳草遠落日一江明十載風波事茫然空復情

渡江得子與書

亦有華陽在誰其汗漫遊書傳天目雨客到秣陵秋江
遠芙蓉細山低蟋蟀幽此懷吾不淺直欲醉丹丘

句曲七夕大雨不得子與消息怪之

七夕憑誰問雙星奈爾何竭來行暮雨早已失天河不
見停梭去寧知乞巧多盈盈一水者人世更蹉跎

江上聞明卿量移南康二首

復得南康信匡廬遂爾狂詩仍官長罵名或簿書強暮
雨湘潭近秋風楚塞長江流如可返為我到潯陽
西望楚天碧茫然空暮霞寸心隔江海雙泪滿蒹葭白
鹿誰為客青山爾即家武陵溪尚在必種桃花

燕子磯

解珮掛蘿薜翩翩凌紫氛乾坤雙眼盡南北一江分
麋鹿散秋草牛羊下夕雲瑤華如可拾即此好遺君

答五岳山人見寄

片雲何處至為爾獨依依寄我青山賦悲愁采石磯
九華明月在五岳幾時歸蕭索長途客玄霜未授衣

南陵道中聞閩寇

到處蒼生泪那堪白羽驚寸心折淮海羣盜駐延平
客有杞人抱誰其漢吏纓百年雙眼在可得見休兵

宗子相集卷六

欽定四庫全書

宗子相集卷七

明宗臣撰

七言律詩

春日

帝里頻看柳色新
那能金馬坐沈淪
誰家羌笛吹明月
無數梅花落早春
羣盜烽烟時更急
五陵冠蓋日相親
故園歲事滄江上
腸斷孤舟起釣綸

送人還楚

薊門搖落朔雲秋
爾去千山落日愁
白髮行藏孤劍在
青楓舟楫大江流
楚人昔有懷沙怨
湘水今還鼓瑟留
念我好傳鴻鴈曲
月明應醉庾公樓

寄趙山人

別久音書何太稀
塞南日日秋鴻飛
青山一去誰消息
白髮雙垂今是非
歲月祗窮詞客路
薜蘿難負楚人衣
故園剩有滄浪水
寒雨江楓吾賦歸

省樓春集

朝來鳴珮散長安漢署千花覆石欄把酒逢君歌北鴈
上書有客泣南冠萬家芳草悲春暮三月高松過雨殘
欲寄愁心與白日浮雲滿目不勝寒

午日同于鱗子與集公實時值雷雨

薊門芳草逐人來午日新蒲對酒開沈陸摠為方朔侶
懷沙獨惜楚臣才人間魍魎雷堪走海上蛟龍雨不回
夜半浮雲難去女更堪孤角鳳城哀

秋日寄袁二丈

清秋何處問吾廬
落日他鄉淚滿裾
邊馬頻年為客計
塞鴻八月故人書
白蘋江上共誰把
紫蕨山中好自鋤
只恐凌雲稱賦者
漢家久矣待相如

送施明府之蕭山

馬上秋風吹客纓
送君千里越中行
芙蓉落日憑誰語
楊柳寒江非世情
羣盜羽書仍北向
頻年將相議南征
白雲茂宰今看女
莫問飛鳬向帝京

二月三首

二月春華滿鳳城萬家楊柳共愁生烽高紫塞愁都護
詔下甘泉議北征昨日羈縻遼市馬西風蕭瑟漢臣纓
瓊衣玉札殊恩澤早把勲勞答聖明

薊門芳草滿長衢是處黃金不可無西入羽書三輔急
北方龍氣七陵孤天王按劍思臨塞大將觀兵豈備胡
報主憂時今更切敢將心事問江湖

聞道元戎出帝畿即看遠道耀軍威漢金百萬朝通使
突騎三千夜解圍塞上烽煙何日定山中麋鹿計全非

由來天意高難問徒自燕雲滯客衣

寄許殿卿

聲名歷下共羊何海岱秋雲幾度過燕市黃金圖駿少
齊人白石飯牛多山中夜賦深風雨醉後春衣泣薜蘿
聖世才賢俱近幸碧池芳草待鳴珂

寄沈二丈

長髯短鬚近何如湖北湖南定卜居琴裏瀟湘中散曲
池邊風雨右軍書秋來雙逕誰看菊月下清尊自摘蔬

舊日綸竿還好在豈能終負楚江漁

寄懷子培舍弟

故園春草日依依別後池塘今是非
明月江楓頻憶弟
清秋塞鴈一沾衣
病多客枕餘芝朮書去名山問蕨薇
聞道滄洲新水濶可憐鷗鷺滿漁磯

省中齋居貽于鱗子與公實元美四比部

向夕停珂省閣幽吏人猶自進春裘
蓬萊雙闕金莖遠
閭闔千門紫氣流
明月在天難命駕白雲垂戶好登樓

明朝獻賦甘泉者漢時秦祠非昔遊

送熊守之太倉因便省覲

羨爾新分刺史符南方千騎亂平蕪
瀟湘天濶春歸楚震澤風高曉入吳
父老幾年憂戰伐使君到日問樵蘇
薊門舊侶能相憶八月雙鴻起太湖

吳明卿席上有賦

陌上黃金使者遊薊門春草暮堪留
一尊破爾青山夢萬里懷人落日愁
鸚鵡昔悲湘客賦鸕鷀初典漢臣裘

酒闌忽聽孤笳起腸斷邊雲出塞秋

望蜀

華髮蕭然寄一官于今蜀道更艱難北來戎馬應看劍
南去尊鱸好掛冠楊柳豈堪巫峽暮薜蘿空對錦江寒
東山舊日饒書札夜夜燈前拭淚看

送冒明府謫教杭州

匹馬天風聽暮笳南歸尚醉故園花尺書在袖逢江鴈
萬里揚帆似漢槎帳下談經餘苜蓿湖中對客半蘼葭

錢塘歲歲春堪卧莫憶漁竿返玉華

送方行人使魯還蜀

仙吏朱衣下紫霄天書親捧翠微遙梅花一夜飛羌笛
明月千山護使輶魯甸王程逢鴈盡劍門鄉思聽猿銷
送君雙淚悲游子白髮清江正寂寥

得黃山人書

昨日傳書到漢京幾年為客向江城懷人夜雨孤尊在
聞爾秋霜兩鬢生半世行藏頻倚劍各天消息一沾纓

何時共逐華陽侶手把芙蓉對月明

寄馬明府

秋雲何處寄相思華髮知君滿面垂去國柴桑陶令醉
還家薏苡漢臣悲竟無尺素傳朱鯉或與仙人種紫芝
一自滄江分折柳十年搖落鹿門期

客舍新遷有賦

如何一別淮南桂竟日淹留冀北花九塞烽煙仍抱病
三年京洛屢移家人間歲事催黃鳥江上春衣阻赤霞

骨肉音書常不斷白雲依舊是天涯

送陳使君還楚

使君匹馬向河梁此去江鄉即帝鄉楚客多才見鸚鵡
漢旌何日渡瀟湘山中杜若迎新綬渚上芙蓉念舊裳
京洛交游俱近幸遲君秋色賦長楊

寄陸子和

江門一別又秋分何處風煙不憶君久客衣裳鶉自結
舊游尺素鴈為羣十年世路彫青鬢三嘆斯人卧白雲

羽翼南溟最相近未須重勒北山文

送陳生南還因寄江鄉游好

薊北秋高起夕峰送君南去楚雲重市中五斗新豐酒
醉後三年長樂鐘耕隴未須悲燕雀涉江何處採芙蓉
寄言舊日殫霞侶曾否天台訪赤松

送李虞部之杭州

一尊晨散帝城遊萬里江雲擁去舟楚國芳荃難汝別
薊門朝雨為誰留萬家烽燧塵纓夕八月蒹葭海戍秋

使者無須頻北顧浮雲何處不堪愁

除前錢惟重夜至

朔雪千門擁騎過西風搖落罷鳴珂
愁邊鴻鴈中原去眼底龍蛇畏路多
關塞豈無邊馬策江湖真負楚漁歌
衣裳歲暮吾將換好與青山長薜蘿

旅懷二首

遠塞風高暮角哀浮雲終日去燕臺
百年駿骨逢時晚十月鴻書隔歲來
錦水即從巫峽出青山定向劍門開

獨傷人事多留滯萬里停雲日幾迴

客計年來尚卜居楚江漁父意何如茂陵肺病長卿賦
漢帝心知賈誼書天地一身惟報主烽烟雙眼正愁予
秋風萬里吹南國叢桂花開滿故廬

寄陸長庚

天涯一自失論文豈有同心不憶君孤客逢秋悲薊草
尺書經歲阻江雲清時易別煙霞路明月難隨鹿豕羣
便欲投簪滄海去兵戈消息不堪聞

韋氏池亭四首同于鱗子與元美賦

城上春山並騎來
曲池芳草好停盃
鸕鷀水淨窺人立
燕雀風高逐岸回

關

玄草在帝京
三見紫微開

吾將

關

賦怪爾臨岐候吏催

雨過林塘花正飛
高松細石俯漁磯
扁舟明月堪長往
萬里滄江胡不歸
猿鳥經秋分客淚
薜蘿他日只吾衣
相逢未可輕相負
一到紅塵事事違

重來韋曲解春襦
碣石華陽望不孤
萬里天風吹短髮

千家涼雨颯高梧青山祗負漁樵問玄鳥深知日月徂
一醉磯邊濯吾足却疑身世即江湖

出門駐馬飲平川為爾徘徊下夕煙捐珮不堪芳草暮
沾衣吾得紫霞篇漁陽戍鼓今何急易水悲歌昔所憐
更欲開尊待新月浮雲容易妬嬋娟

寄陳使君

春日春風太可憐憂懷別緒俱茫然江南涕淚望松梓
冀北花鳥空雲煙駕鷺暫解仙子珮蓼莪應廢門人篇

袖中尺素向誰寄不見雙鴻飛暮天

西來

西來秋色滿燕山昨夜平邊使者還白羽書傳關外捷
黃金詔賜殿中班竟何漢卒屯青海難信班生老玉關
聞說單于頻出獵相逢馬上看刀環

送王參軍之橫州

中原落日怨離羣萬里關山路又分亂後誰為驃騎使
征南吾憶伏波軍湘妃斑竹行秋雨帝渚蒼梧起暮雲

銅柱高標猶在眼
好將勲業答明君

諸子夜集

鳴珮朝來散紫宮
相逢意氣為誰雄
一尊醉憶江湖上
三月春殘風雨中
消渴文園卧司馬
題書碣石問冥鴻
青山南北吾將往
肯向人間泣路窮

雨中得家書

走馬歸來稍自寬
愁邊蕭索漢庭冠
葵榴不落千枝淨
風雨頻生六月寒
客到庭階驚自出
書傳兄弟淚難看

兩鄉白髮關河阻日日江鴻愧羽翰

再寄袁二丈

高秋搖落薊門城萬里相思對月明人在蒹葭歌白苧
病中風雨望金莖關山尺素時堪寄南北孤鴻暮不征
聞說子雲能獻賦長楊羽獵古今名

人日東楊子

游子頻年棲漢庭又看春事落階蓂乾坤雙眼逢人日
江海孤槎是客星病起鬢毛知汝白愁邊楊柳為誰青

風烟況復音書隔向夕征鴻不可聽

寄懷趙子隆

當日相攜十二橋寒江東接廣陵潮青雲客計龍門策
明月誰家鳳女簫久別書來愁鴈鴛故園秋盡憶蘭苕
長安新柳黃金色遲爾看花匹馬驕

送人歸淮南

燕市六月芳草斑落日忽驚游子顏騎發邯鄲逢趙壁
雨來桐栢近淮山黃河日夜去仍急滄海東南浩不還

秋到正逢叢桂色王門諸客共誰攀

春興八首

往歲含香紫禁東千官環珮散天風
茂陵病逐樵人去淮海春殘桂樹叢
宦計雲霄惟敝舄主恩日月在冥鴻
簡書使者江亭滿可得相逢問漢宮

滄洲生事起垂綸蜀使西來淚滿巾
萬里書傳巫峽雨幾時歸摘楚江蘋
青猿知在關山聽白髮應催日夜新
人世百年堪俯仰薊門一別五經春

遙傳塞上又徵兵使者飛書入漢京邊馬不歸青海戍
朔雲常斷玉關纓七陵松檜今開府三輔河山夜勒營
自是羣公能策敵即看赤羽莫深驚

建業春雲咫尺看雲中宮闕舊長安壽陵只在鍾山上
紫氣遙憑白日寒劍珮千秋還鳳吹關河西顧自龍蟠
至今父老談神武匹馬傳書定契丹

石門草色曳春裾愁裏春花滿舊廬計吏徵求那太急
蒼生顚顚竟何如黃河北注魚龍泣赤壤終年稼穡虛

天上近傳優恤詔可能一夕起樵漁

中原五子送將歸十二峰頭拾紫薇別後何人鸚鵡筆
書來念我薜蘿衣邗溝明月行將問鴻鵠天風高自飛
南北岐途兩無賴江門烽火照漁磯

高楊亂石把雕弧有客頻過問壯圖落日中原停萬騎
悲風萬里下三吳臺前麋鹿秋相泣海上鯨鯢夜自呼
聞道中丞新授命急將戎馬掾姑蘇

司馬提兵夜渡河羽林諸將擁雕戈青山一戰殘鼙鼓

落日千家泣綺羅盜賊似聞皆壯語東南何地不哀歌
浮生轉覺江湖窄難把衣裳任芟荷

江村

西風朝散漢臣班萬里江村一夜還題柱聲名空畫省
採芝歲月有青山烟開曲水頻垂釣日卧蒼梧不掩關
直欲天台拾瑤草何人遲我白雲間

寄顧純一時客于揚

自君去矣湖之濱日夜湖南生白蘋江雨千家任伏枕

潭雲百尺堪垂綸書傳孤鴈正明月病起空山愁暮春
桃花流水可避世武陵樵者今何人

寄袁二丈

孤鴻不到海門煙別後音書動隔年江上暮雲空復好
湖南新月為誰圓懷人竟負看梅曲卧病長歌采蘼篇
咫尺山陰飛早雪可能一上剡溪船

九月寒花照客盃故人何處獨登臺霜華好與青楓落
秋色能堪白鴈催鼓角孤城猶自急干戈雙眼共誰開

知君近有江南賦千古深知庾信哀

同子與使君登文游臺臺在高郵

何處星槎使者迴孤城寒吹共登臺湖間明月雙珠出
雨後青山萬井開鍊石汝從天日到觀濤誰更廣陵來
越吟楚曲俱搖落江左新驚鼓角哀

趙山人至

千行垂柳暗江村江上何人到石門倚杖年華垂素髮
登樓雨色滿清尊驟雷似有蛟龍怒落日愁聞豺虎喧

只此漁舟堪結侶未須楚水問桃源

贈凌文學

有客問予青鷺洲當年遇汝蕪城秋一尊樓閣短簫發
十里芙蓉片月留別後素書不肯寄袖中白璧何所投
明朝江路嘆遊子莫遣霜華盈敝裘

拱極臺

高臺此日眺中原臺上空驚夜色繁人在千峰明月裏
天垂列宿紫微尊秋衣薜荔真吾計早歲漁樵亦主恩

即擬尋仙向五岳烽烟猶自滯江門

萬里

萬里青楓悲素秋千門風急楚雲流江南涕淚重城急
海上親朋暮角愁西入戰烽迷漢騎年來漁父失江鷗
寄言諸將須深策早把新軍駐石頭

待元美不至

書來有意問滄波曉起柴門撫舊柯孤楫中流揚子暮
白雲西去秣陵多雙龍一別各風雨五斗相逢今薜蘿

寄語湖邊垂釣者好尋蝦菜待君過

誰傳消息到湖西欲來不來空杖藜昨日石門開枳橘
早時孤艇散鳬鷺愁人碧草戎戎短候客清尊夜夜攜
二十四橋今寂寞未應重為玉簫迷

真州

十月孤城鼓角哀悲風搖落此登臺山形西轉千虹立
濤色東驅萬電開日下白雲鐘阜起江南紫氣漢陵來
臨流怪爾鮫人語一夜乘潮能百迴

寄茂秦

與君秋別薊門鐘
每見秋雲不可從
雜佩相貽仍蕙芷
美人一水隔芙蓉
月明江上歌梁甫
病卧山中擬蜀龍
盡道漳河成獨往
十年高咏在青松

送人南歸

楚天搖落欲何之
把酒青門淚並垂
漢署昔題金馬賦
淮南秋問桂花枝
還家客夢寒蟬急
去國君恩白髮知
歲晚衣裳仍好製
扁舟隨處有江離

贈吳子

廣陵城西江可憐
廣陵城北草芊芊
余看鴻鴈歌明月
爾客崑崙今幾年
湖上一尊開橘柚
人間雙泪墮嬋娟
相逢揔是淮南侶
莫負秋風桂樹篇

寄李順德于鱗

憶爾狂歌滿帝京
春來紫綬寄專城
漢庭詔下二千石
良吏人傳卓魯名
日落盧龍寒朔騎
風高涿鹿斷塵纓
塞帷定有江門思
碣石青天是舊盟

暮春

莫向桃花又問津只今已是武陵人
經旬芝朮還歎枕細雨林塘不住春
一入青山疎故舊千秋素業在沈淪
湖邊似有漁舟路急與秋風長綠蘋

江上秋高有懷京洛舊好李王南北梁
謝飄零獨子與明卿在焉俯仰傷情賦此寄臆

荆高一去燕市虛獨留爾輩空躊躇
黃金匕首今安在擊筑悲歌忍自疎
千古英雄堪俯仰一朝聚散有樵漁

江山南北秋華潤腸斷孤鴻八月書

寄袁三子敬

去年握別楚江流一夜新霜擁去舟人隔蒹葭滄海暮
書來風雨白蘋愁茂陵消渴還稱賦明月聽砧獨倚樓
知爾詞華千氣象于今莫厭鹿門遊

雨中聞島夷消息太劇

一雨滄江起杖藜愁邊芳草正萋萋天門石裂雙雷下
海國烽高萬象迷百戰蒼生鮫室裏頻年赤羽鳳城西

謝安莫負東山望昨日徵書到會稽

二月五日

今年春事何太遲二月五日寒如絲
細雨忽見芳草色晴雲猶護梅花枝
鼓吹長江日夜急羽書匹馬東西馳
天時人事且如此忍向青山歌紫芝

送太史李公還朝

楚江二月送朱輪江上千家長白蘋
宮錦尚留叢桂色仙舟不住廣陵春
雲間鷓鴣含香入日下夔龍佩玉新

一自周南歸太史石渠視草更何人

北去樓船向紫垣長途芳草日開樽
漢庭秋問仙人掌
方朔才高金馬門羣盜兵戈無上策
蒼生顛顚滿中原
安危將相須公等宵旰于今獨至尊

酬沈二山人

夜夜西風吹客纓江湖咫尺有離情
高秋伏枕黃柑盡
明月懷人白髮生雨後桑麻頻入寇
年來畎畝只談兵
亦知已作漁樵伴未必深山好避名

顧一丈夜集

江上草堂開夕陽寒波十里即滄浪西湖客到扁舟雨
故國鴻歸昨夜霜一別鬢殘邊馬後兩秋書隔楚雲長
相逢斗酒且沈醉莫惜餘歡對舉觴

懷公實

梁鴻一疏向樵漁子亦歸來掃敝廬青笠孤舟空自遠
黃金大藥竟何如桂殘淮海秋移病草碧羅浮夜著書
三十六峰明月裏相逢亦有紫霞裾

席上贈劉一丈墀石

滿目垂蘿青不收，何人日日問羣鷗。
尊前細雨千峰暮，天外明星萬樹流。
歲月豈能殘楚佩，行藏且莫問吳鉤。
憐君空抱蒼生策，一卧江門四十秋。

早春寄明卿舍人時以使事還楚

湖北湖南春氣鮮，渚鷗沙鷺何翩翩。
梅花千嶂暮不落，芳草雙江寒可憐。
漢使近持金馬節，楚漁難別洞庭船。
醉來偃蹇三湘裏，更是何人白雪篇。

過揚州

湖上行吟落日邊，高秋蕭索倍淒然。
燕城舊識參軍賦，玉樹空傳帝者篇。
隋苑雲殘楊柳色，邗江夜斷荻蘆煙。
可憐白舫青蓑者，尚有漁歌似昔年。

青楓滿目生悲涼，二十四橋空石梁。
明月玉簫何處聽，寒江秋草為誰長。
西雲獨照崑崙紫，古道頻吹杜若香。
世故客愁那有極，欲憑尊酒問垂楊。

真州謁文丞相祠

文相祠前楓樹丹真州城外送波瀾千秋不盡中原泪
此地真成故國省一自燕雲孤騎入至今龍氣大江寒
客游莫聽寒笳起白日青天處處殘

春日

春風冉冉吹山亭春日娟娟迴翠屏淮浦又見桂枝發
江洲重入薜蘿青落花流水去杳杳石泉飛雨寒泠泠
愁來甘卧茂陵病寂寞雲霄空客星

冬至夜高子明陸子和子培舍弟集小館

孤夜羣星聚此筵寒梅細石晚相鮮兩儀消息還長日
雙缺追隨自昔年人世歲華空鬢髮江門戎事正風煙
哀時詞客無今古久矣吾悲庾信篇

得元美書

江上孤槎憶送君薊門消息阻秋分驚風萬里吹邊鴈
錦字千行隊楚雲北極頻頒龍武詔東吳新挫伏波軍
漁樵舊業無須問處處青山泣紫氛

懷余德甫比部

一別垂楊秋又分
楚材原自豫章聞
七陵寒吹歌明月
列署秋衣生白雲
病乞薜蘿空復遠
日看麋鹿遂為羣
尺書未報燕南使
何處聽鴻不憶君

諸子夜集因寄長庚

萬里西風吹急湍
茆堂幽事起憑欄
客尋玄草頻捐佩
醉倚青松不著冠
漁父暮歸雙艇急
鮫人夜語一江寒
聞君已作餐霞侶
石上瑤華只自看

七夕

今年七夕又山家散髮孤吟到暮霞天上雙星罷機杵
湖南斗酒出蒹葭白雲中夜來江色紫蒹清秋長石華
萬里天河寒在眼何人咫尺問仙槎

寄錢惟重時以使事還吳

使者持節瀟湘回三吳消息愈堪哀蛟螭盡飲太湖水
麋鹿又上姑蘇臺組練徵兵已百戰艱危報主須羣才
君看眼底紛紛者躍馬卧龍安在哉

得方山人書

憶昔同登冀北臺黃金識爾入燕才三秋消息邊雲斷
十月音書楚使來落日中原猶作客扁舟滄海負傳盃
青楓莽莽孤鴻暮何處臨高首重回

子與投書約訪山中賦此以待

聞君遙別薊門樓錦纜牙檣漢使舟昨日書來桐栢水
西風病卧廣陵秋霜前鴻落驚相問江上龍歸空復愁
昔者淮南招隱後幾人能問桂枝幽

病起

病起蕭然一鶚冠
年年春事鹿門看
長堤芳草愁邊綠
落日梅花笛裏寒
吳使傳書多戰伐
楚人貽佩只椒蘭
武陵稍隔滄浪水
遲爾秋風把釣竿

頻年

頻年客淚滿蓬蒿
是處生涯半羽旄
漢詔北來戎馬急
楚江南去陣雲高
三軍歲晚悲蘆角
諸將秋深損戰袍
百計艱危君莫問
宵衣此日聖躬勞

袁二丈夜訪山館劉一丈偕集二首

湖北湖南落日斜誰來題竹野人家自言海上多秦石
始信河邊有漢槎斗酒共聽今夜雨江梅曾對十年花
別來玄草今何似容易秋風老歲華

石門寒雨永茲宵多病文園起寂寥已分白頭仍進履
相逢青眼自垂髫時來蕭艾偏多色歲晚魚龍何太驕
偃蹇揚雄終獻賦西風莫問赤城樵

得明卿還京消息却寄

憶爾孤帆落日遙洞庭秋色莽蕭條幽蘭雜佩湘君贈

暮雨高唐楚客驕方朔已歸金馬詔枚乘空賦廣陵潮
悲歌舊侶相逢日何處妖姬醉紫貂

孫子升過訪

四海賓朋舊不疎可憐蹤跡斷樵漁白蘋客到秋江雨
赤鴈吾愁隔歲書湖上一尊停夕吹山中十日把寒裾
知君即草明光賦空有相思到敝廬

蜀道

蜀道之難自古今豈令華髮獨能任思家多少玄猿淚

解綬徘徊赤子心
秋落舟航巫峽險
人言風雪錦江深
坐來萬里誰消息
明月關山處處砧

渡河

孤舟東望淮水潯
長空搖落千樹林
關塞蕭條紫極遠
魚龍浩蕩黃河深
中流羯鼓起遐色
萬里天風吹夕陰
懷抱鬱鬱復為客
白石滄江違寸心

舟夜夢顧一丈

呂梁之水青石磯
中天寒月何霏微
梅花寂寞有誰賦

芳草飄零胡不歸江海故人忽入夢英雄白首空霜衣
明朝懷袖有尺素安得雙鴻雲際飛

登景山落霞亭

雪後登山落木繁朱霞猶自出天根奇峰斷石頻停馬
絕壁枯枝亂掛猿桂樹千秋懷舊國浮雲何處望中原
蓬萊東去未為遠吾欲乘風叩日門

搖落青楓此上臺石門雙磴倚崔嵬河流南注崑崙折
龍氣西看芒碭摧十月衣裳寒杵急孤城睥睨暮笳哀

故山麋鹿還誰主
楚水淮雲首重回

南旺湖夜泊

落日孤舟下石梁
蒹葭寒色起蒼茫
青天忽墮大湖水
明月長流萬里光
中夜鷗鷺迴朔氣
南來鴻鴈亂邊霜
他鄉歲暮悲游子
涕淚時時滿客裳

宗子相集卷七